

Museo Arqueologico ta recorda Ignacio "Nacho" Wernet



ORANJESTAD (AAN): E siman aki Museo Arqueologico Aruba en particular y sector cultural di nos comunidad en general a sufri un perdida grandi cu fayecimento repentino di sr. Ignacio "Nacho" Wernet.

Nacho a cuminsa traha cu arqueologo drs. Egbert Boerstra na 1978 prome cu museo a habri. E tempo ey a acerca Nacho pa yuda cu mudamento di material arqueologico for di Watertoren di San Nicolas pa e edificio situa na

Zoutmanstraat 1. Nacho a yuda drecha e edificio di Zoutmanstraat y a traha vitrina pa e sala di exposicion. Ora cu tur cos tabata cla pa apertura oficial di Museo Arqueologico na 1981 a pidi Nacho pa e keda como parti di personal di e museo nobo. Nacho a acepta y a cuminsa un carera cu museo cu a dura te dia cu el a bay cu pensioen na 1999.

Nacho a siña for di Boerstra con pa reconoce sitionan arqueologico y a yuda den excavacionnan na

Malmok, Budui y Sabaneta. Bou guia di Evelino Fingal, director e tempo ey di museo, Nacho a traha cu arqueologonan profesional cu a bin traha na Aruba. Asina por menciona Dr. Aad Versteeg y dr. Kees Schinkel ambos di Universidad di Leiden kendenan a confia den e experiencia di Nacho ora di por ehempel determina locacion di sitionan y dicidi mihor manera pa excava. Un trabao sumamente valioso tabata ora a yuda Kees Dubelaar re-inventarisa e sitionan cu pintura Indian. E buki cu a worde publica despues door di Dr. Wagenaar Humelink tabata danki den gran parti na trabao y dedicacion di Nacho.

Despues cu el a bay cu pensioen Nacho a cuminsa traha y toca caha di orgel. Su mes caha tabata yama "Mi Speranza". Aunke e no tabata envolvi diaramente den trabao di museo mas, personal di museo a haci apelacion den varios ocasion riba Nacho su conocimiento.



Nacho semper tabata cla pa comparti esaki y duna su conseho, sin falta un anecdota y un chiste.

Danki na personanan manera Nacho hopi artefacto y conocimiento di locual ta herencia arqueologico di

Aruba ta disponibel pa futuro generacionnan. Museo Arqueologico ta desea su famia un biaha mas hopi forza y ta gradicinan tur e añanan cu nan a comparti Nacho cu museo.